


FASNACHTSGESELLSCHAFT



BASEL

STAMM

GEGR. 1955

Fasnacht 2008

Nur fir dr Kommerz duet är sich loone – dr Kampf vo de Dradizioone

Knallhart kämpfe hüt d Tradizione
Um s liberlääbe und um d Kunde-Gunsch
Denn alti Brüüch dien sich nimm loone
S git d Nostalgie ganz ummesunsch
Und doch het d Tradizion e Sinn
Wenn au e ganz e bsundere
Als Zwägg firs modärn Marketing
Do duesch di iiber nyt me wundere.
Dr dääglig Kampf um Märtaadail
Um Käufer, Märtsigmänt und Bryyse
E Jeede presentiert sy Waar woolfail
Mecht d Märtpresänz bewyysse
Damit Tradizione iiberlääbe
Bruuchts Events und Gääg und Gschigg
Machscho nid mit, so bisch dernääbe
So nutzisch hald e jeede Drigg
Gäbtis numme an aim Daag Oschtereier
Wäre d Grätimänner nur am Säxte Zwölfte z griege
Denn wurdi Oschtere zer Kloschterfeier
Und dr Santiglaus zur Aidaagsfliege
So het au dr Oschterhaas begriffe
As är sy Gschäftsmodäll mues moduliere
Und drum sott zue grobe Waffe gryffe
Wenn är mecht wyter exischiere
So bschliet dr Oschterhaas e Startegy
Wo aifach isch und haut:
Ab sofort soll s ganz Joor Oschtere sy
Dreischichtig wärde d Näschtli baut,
Und Schoggahaase gits au jeede Daag
Und d Zuggereili - dääglig frisch
Derzue gfärbti Eier, sovyyl me maag
Bref, s ganz Joor Oschtere uf jedem Tisch
So luudet die ney Kommerz-Devyse
S Konzäpt isch glaar und d Botschaft segg
Nur so kunnt d Oschtere us dr Gryyse
Und dr Ruubel rollt bim Zuggerbegg
Die Konkurränz spyrt au dr Santiglaus
Denn d Saison vo de Grätimänner
Isch kurz und numme grad ai Daag
Ab jetz gits drum vo Herbscht bis Jänner
Grätimänner, sovyyl me maag
Derzue propagiert dä Glaus als Hit
En Eesel-Leasing rund um d Uhr
Das *Rent-a-Donky* für e schnälle Ritt
Zeigt Kundenööchi puur
Au kaa me jetz als Sälbschtabhooler
Dirägg per Händy d Ruete bschtelle
Und de Goofe isch es au vvyyl wooler
im Glause-Center d Nüssli z schelle

D Mandariinli gits als Jumbopaggig zäntnerwys
Und dr Läbkueche isch im Dotzed Aggzion
Au d Ärdnüß gits zum halbe Bryys
Derzue e Gratis-Santiglaus-Balloon
Do wacht au s Wiehnachtskindli uff
Bedränggt vo dääre Konkurränz
So zwische Glaus und Schoggihass wird's muff
Und sait: oo lägg – mir länggts
Gits s ganz Joor Oschtere und Grätimaa
So blyybt fir my Gschäft kai Platz
Ab jetz foot d Wiehnach scho im Augschte aa
Sunscht isch my Gschäft fir d Katz.
Es schiggt en EsEmEs an Santiglaus
Mit dr Message, es syg wies well,
Ab jetz herrscht Krieg mit Mann und Maus
Und lägg du mir am Tschingelbell
Au s Wiehnachtskindli expandiert
E Halleluia-Shop wird grindet
S wird Wärbig gmacht, s wird inveschiert
E jeede Gääg dä zindet
Kuum hersch d Erschtaugschte Kracher knalle
Straalt scho dr erschi Wiehnachtsstärn
Und duet d Erschtaugschte Reed verhalle
Gits Äänisbrot und Zimmetstärn
Die erschte long-life Dännli gits im Septämber
Und als Wärbegääg, das sich e Splyyn
Gits e n Adväntskaländer scho im Novämber
Mit Wiehnachtskind und Halloween
So toobt dä Kampf um d Tradizioone
Kai Drigg, kai Macheschaft isch z fyys
Denn d Käuferschaar zellt Millioone
Hauptsach s stimmt Aagebott und Bryys
Dr Verdrängigskampf an dr Traditionefront
Wird hart gfiehr - ooni Gnade
Me leggd dr Geegner ganz gekonnt
Hauptsach me kaan em schaade
So kämpft s Wiehnachtskindli geege dr Oschterhaas
Und dr Niggi-Näggi mit em Halloween
Me kennt kei Gränze und kei Maass
Denn s wingge Aggziengewinn und Glorieschyyn
Es schynt als ob dr Deyfel do duet s Zepter fiehre
In dämm ominöse Kampf um d Tradizion
Äär duet mit Boosheit in däm Kessel riehre
Mit fyyssem Lächle, Spott und Hohn
Missbruucht me Tradizion zum monetäre Zwägg
Dient dr Volgsbruuch numme no zur Fasaade
Denn profitiere Wenig, das schläggt kai Geiss ewägg
Doch mir Alli hänn dr Schaade.

Dr tradizionelli Kampf um d Märtpresänz vo de
Ladärne findet wie allewyl uff em Minschterplatz und
dä vo de Wääge- und Reggwisyte bi dr Kasäärne
statt vom Mäntig Zoobe bis am Mittwuch demorge.

www.muggedaetscher.ch